

No Servus, Diener und Habe die Ehre!

Etze kimmt dos

Nej su wos

vu Sömde, n 06. April 2024



Felix Müller

Karfenatl

Mit dar dötn Karfenatl-Geschöchte mecht ich mich ols neuestr und jingstr Nej-suwos-Autor vurstelln und n Beweis otratn, doss ou ennr vu dar jingern Generatioun noch pauern kon.

Alsdann:

Tut mr sich heutzutags wan zun Assn eilodn, ös dos ne ömmr ejfach. Mr sellte o olls und jeds denkn. Dr ejne dorf kej Flejsch, die andre dorf kejne Glutn. Wiedr a andrer mog kejne Kohlehydrate und ou Zockerzeug ös tabu.

Do könnte mr mejnen, doss dos friher ejfacher wor. Etze ho ich noch ne all zu ville Juhre uf n Puckl, weiß obr vu n ejngen Kindsein har, doss dos dazemoul ou ne su lechte wor. Zwor ne grode, weil su ville Allergien odr Sondrwinsche an Umlaufe worn, obr weil kennr ei dr Schule mich hout vrstiehn kenn.

Do ho ich ejmoul enn Freund mit zun Assn hejmggebracht und ho vrsucht, n zun drklehrn, doss es „Karfenatl mit Areppmauke“ zun Mötschassn gahn wier. Dos konnt a ock iehrhaupt ne vrstiehn. Salt beim Assn hout r dann gemejnt, ös wärn doch ock „Fleischpflanzerl mit Kartoffelpüree“. Dos ho wiedr iech glei energisch vrneint, weil s worn doch Karfenatl.

Örscht die Tage hout enne vu dan Kolleginnen vu Regensburg drzehlt, doss se dazemoul, wie se noch ane klinsche Knauke wor, su wos Ahnliches drlabt hout, doss kennr außer ihr Karfenatl gekannt hout.

Dou dro sitt mr ock, doss de Gablunzr Kiche an ganzn Lande beliebt wor. Iebrsch Assn kennte mr noch vill drzehln, dos sein obr andre Geschöchtn. Obr wu sein etze de Worzln vu n Karfenatln? Moiche sohn „Bulettn“, andre „Fleischpflanzerl“ odr obr ou „Fleischküchle“ und „Frikadelln“. Iebrn grußn Teich, ban Amrikanrn, hejßt ös sugor „Patty“, und dou stackn die dos Ding ei ane Samml nei und s word „Hamburger“ genannt. Nej suwos! Su hout a jeds senne ejgne Ort vu n Karfenatl, ganz ejgol wu uf dar Walt. Amende ös, wie bei villn andern Sachn, ejs gewieß: dr Ursprung ös ei Gablunz!

Su leits uf dr Hand, doss a jedr senne Karfenatln hejßn dorf, wie ar mechte. Söchr ös ock: Wemmr se „Karfenatl“ hejßt, schmackn se öm Walt bessr.

Mejnt dr ne ou?
